

Date – 07/04/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram Sorkar chuan, indona thleng mek vanga eirawngbawlna Gas leh tuialhthei-a harsatna thleng thei lakah Mizoram Sorkar chuan ngawrh takin hma a la reng tih sawiin mipui tan chia-na tur a awm lo an ti.
2. Mizoram sorkarin February ni 2 atanga May ni 30 inkara support price awma kuthnathawktute sawhthing hralh tura a ruahman zaa 7.89 a hralh tawh.
3. Rajya Sabha Chairman C P Radhakrishnan leh Lok Sabha Speaker Om Birla te chuan Opposition memberten Chief Election Commissioner Gyanesh Kumar bang tura nawrna motion an thehluk chu an hnawl.
4. Tamil Nadu Assembly inthlan leh West Bengal inthlan thawhkhatna chuh tumte tana nomination thehluk hun chu nimin khan a tawp.



OIL & GAS

Mizoram Sorkar chuan, indona thleng mek vanga eirawngbawlna Gas leh tuialhthei-a harsatna thleng thei lakah Mizoram Sorkar chuan ngawrh takin hma a la reng a. Tun dinhmunah eirawngbawlna Gas leh tuialhthei chu Mizoramah a thleng tha a, mipui tan chia-na tur a awm lo tih an sawi.

Sawrkar tarlan danin nimin April ni 6 thleng khan Mizorama LPG Distributor hrang hrangah Domestic (14.2Kg) bur 13,801 a awm a, kawng laka thang mek bur 26,187 nen a vaiin bur 39,988 awm ang a ni a. Commercial (19Kg) chu Distributor-ten bur 512 an kawl bakah kawng laka thang mek nen avaiin bur 824 a awm a. Petrol pawl Filling Station-ah Kilolitre 1,392.3 awmin, kawng laka thang mek Kilolitre 351 nen a vaiin Kilolitre 1,743.3 awm ang a ni a. Diesel chu Filling Station-a Kilolitre 1,546.2 awmsa bakah kawng laka thang mek Kilolitre 435 nen a vaiin Kilolitre 1,981.2 awm ang a ni.



ASSEMBLY SPEAKER

Assembly Speaker Pu Lalbiakzama chuan Khelo India Tribal Games neih zawh taka Bronze Medal latu Ni. Lalmangaihshangi, Dilkhan khua chu a Pisa-ah lawmpuina hun a hmang.

A Pisa lawmpuina inkhawmahPu Lalbiakzama chuan, a bial chhung thalai zingah infiamna kawnga theihna nei tha, National level-a lang pha an awm chu a chhuan thu leh ropui a tih thu a sawi a. Midangte tana entawn tlak a nun fimkhur lehzual a, tanla sauh sauh turin a fuih a ni.

Lalmangaihsangi hian kumin March ni 28 atanga ni 31 chhunga Chhattisgarh-a Khelo India Tribal Games neih zawh takah Mizoram aiawhin Wrestling Below Kg. 76-ah khelin Bronze Medal a la a ni.



GINGER

Mizoram sorkarin February ni 2 atanga May ni 30 inkara support price awma kut hnathawktute sawhthing hralh tura a ruahman zaa 7.89 a hralh tawh.

Mizoram Agriculture Marketing Board (MAMB) Co-Chairman Dr KC Lalmalsawmzauva hnen atanga Akashvani News Aizawl thudawn danin, February ni 2 atanga support price awma kut hnathawktuten sawhthing an hralh theih hun chhung tura ruahman kal mekah April ni 5 thleng khan sawhthing hralhna hmun tur bika ruahman Secondary Collection Centre (SCC) 64 zinga SCC 28 - Aibawk, Chawngtlai, Cherhlun, Chhingchhip, Farkawm, Hnahlan, Hnahthial-I, Kanghmun, Khawhai, Khawlailung, Khuangleng, Mamit, Mualkawi, Ngopa, North Vanlaiphai, North Mualcheng, Phullen, Ratu, Reiek, Sialhawk, Tawipui North 1, Thingdawl, Thenzawl, Tipa, Tuidam, Tualcheng, West Phaileng leh Vaphai atangin sawhthing kg nuai 27, sing 3, sang 2,098 chu cheng nuai 7,96, sing 4, sang 4,342-a hralh a ni tawh a ni.

Kan corr report ngaithla ang.

Mizoram Sorkar chuan February ni 2 atang khan SCC katlangin loneitute Sawhthing lei tum mahse sumdawngten kut hnathawktute sawhthing an leina man hniam ber tura a bituk, Reserve Price chu cheng 40 atanga 45 inkar a ni a, a san em avangin leitu an awm mai lova, February ni 9 khan Reserve Price chu cheng 30-35 inkarah tihniamin SCC pahnih- Mamit leh Tuidam atangin sawhthing chu hralh chhuah chauh a ni a. SCC 28-ah te hian sumdawngte chuan sawhthing chu kg-ah cheng 25 atanga cheng 30 inkarin an lei mek a, sorkarin ba awm loa lei tura sumdawngte a tih angin sumdawngte hian an sawhthing leina man hi kut hnathawktute hnenah an pe vek tawh a, sorkar erawhin support price chu hralh zawh hunah a pe chauh dawn thung a ni.

MAMB-in support price awma sawhthing hralh theih hun tura a bituk chu February ni 2 atanga May ni 30 thleng a ni a; SCC 64-a sawhthing awm zat tura tarlan chu quintal nuai 3, sing 4, 6,470 niin, tuna sumdawngten an lei tawh zat hi a vaiin quintal sing 2, sang 7, 320.98 a ni a, hralh tur zat atanga zaa 7.89 a ni.



MHIP SIAHA

MHIP President Pi Lalliani chuan Aia upa zah a pawimawh thu sawiin mahni Pi leh pu innghakte thu ngaichang tur leh duhsakna lantir zel a pawimawh thu a sawi.

He thu hi nimina Mizo Hmeichhe Insuihkhawm Pawl (MHIP), Sub-Headquarter Siaha Conference vawi 14-na Information and Public Relation Conference Hall, Council Vaih Siahaa neih a hmanpui na ah a sawi a, Pi Lalliani chuan kum upate chu ngaih pawimawh zual an ngaih thu sawiin an thu ngaihchan thiam a pawimawh tih a sawi a ni.

MHIP President chuan hmalakna tharah pi leh pu te thu lak thiam a pawimawh thu sawiin kawng engkima mahni pi leh pu te an pawimawhna hre thar a duhsak zel a ngaih thu a sawi a. Aia upate zahna chu hre thar turin MHIP members te a chah nghal bawk.

Nimina hun hmana hian MHIP General Headquarters a General Secretary Prof Irene Lalruatkimi pawhin thusawiin MHIP ah hnam tinreng an leng a ti a, Siaha MHIP members te chu nu chan chang turin a chah nghal bawk.

Tun dinhmunah Siaha District ah hian Branch 14 a awm mek a ni.

<><><>

SOCIAL WELFARE DEPT

Mizoram Sorkar in Jordan Centre Mizoram Synod enkawl tura kum 15 atan inremna a ziah pui hnuah nimin khan Social Welfare Department hotute leh Mizoram Synod hotuten an enfiah.

Jordan Centre ah hian Social Welfare Department hi Joint Secretary Pi Zonunthari hovin an kal a, Mizoram Synod lam hi Moderator Rev John Raldosanga bakah Synod Social Front atangin Rev K. Lallawmzuala, Executive Secretary, Rev P. Zohmangaiha, Secretary, Rev. Lalrinmawia leh member dang mi 3 an kal a ni.

Voicecast

Jordan Center ah hian Qtrs building 9, chhungkaw 30 vel awm theihna te, Office building, damdawi in bakah hmeichhia leh mipa ruihhlo ngai enkawlna hmun a hrang ve ve a awm a. Ministry of Social Justice & Empowerment norms leh guidelines anga din a nih avangin building hrang hrang Counselling, detox, recreation, dorm, chapel leh a dangte a awm kim hle a. Building te hi lian vak lo, a hrang hrang a nih avangin tun dinhmunah mi 70-100 bak an leng lova. A za vaiin building hlan chhawn tur hi 40 a awm a, Repair ngaite leh thil mamawh belh te enho nghal a ni.

Sorkar leh Synod inremna angin Jordan Centre hmunhma, building leh a chhung bungrua awm te hi a nih ang ang a inpek turin an lo inrem tawh a, Synod lam hian June thla SEC ah an kalpui dan tur hi an rel fel dawn a ni.

<><><>

DRUG DISPOSED

Nimin khan Lunglei AP Tlanga Incinerator Centre-ah Lunglei District Disposal Committee chuan ruihhlo (heroin no. 4) gram 51 (₹18,88,400/- man hu) an hal ral.

Ruihhlo hal ralnaah hian DDC member-te an tel a. Ruihhlo hal ral tak hi Lunglei Police Station-a ND&PS Act hnuai case ziah luh niin, Lunglei Judicial Magistrate First Class-I-in phalna a pek anga hal ral a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

SERCHHIP DPAC

Serchhip District hmasawna hnathawh dan tur thlirtu District Programme Advisory Committee nimina thukhawm chuan zirna lama District hmasawna tur hrang hrang an sawiho.

Serchhip District Programme Advisory Committee chu nimin khan an Chairman DC Pu Paul L Khuma hovin DC Meeting Room-ah an thukhawm a. Kum 2025-2026 chungang an hmalakna tur Annual Work Plan an sawi.

DIET Principal Pi Jane Vanlalmuanpuii chuan an hmalakna tura ruahmanna an neihte sawiin, Trafficking chungchangah Community Awareness neih tur a ni a. Elementary School hrang hrang 5 hnenah School Support pein, an zirna kaihnawih atana mamawhte an pe ang a. Elementary School tan vek hian District huapin Science Fest buatsaih a ni baw ang. Pre School Teacher Education tana buatsaih Teaching Learning Material Design Competition pawh buatsaih tawh niin, endik fel tawh a nih thu a sawi a. Heng an hmachhawp te leh an hmalakna tura an chhawpte hi Committee chuan a pawmpui a ni.

<><><>

DISASTER MANAGEMENT

Saitualah Village Disaster Management Committee huaihawtin nimin khan Siatual DC Conference Hall ah chhiatrupna thleng thulha chet lak dan tur training neih a ni.

Training ah hian Disaster Management chungchanga thil pawimawh hrang hrang tlangpuite leh chhiatrupna hmachhawn dan inzirtir a ni a, chhiatna hmuna thleng hmasate tana tihtur pawimawh leh tih hmasak turte, chhanchhuah dan bikte, hliam tuarte bawihawm leh lakchhuah dan turte bakah kangmei chhuak tur ven dan

leh first aid hman dante, nunna chhan dan kawng hrang hrangte inzirtir a ni a, Training ah hian Aizawl District Disaster Management Authority – 3, QRT, Saitual District – 3, VDMC -19 te atangin mi 2 theuh an tel thei bawk.

<><><>

PUKPUI

Lunglei Pukpuia Mizoram Engineering College din tur chu Mizoram Sorkar ruahmanna angin kumin Academic Session, July thla hian Class tan tur a hmalak mek a ni a, tunah hian a panna kawng, tui leh eng lampang te PWD, PHE leh P&E Deptt ten an buaipui mek a, chaktaka hmalak a ni tih kan corr thudawna chuan a sawi.

He Engineering College-ah hian Civil Engineer leh Computer Engineer zirna hawn phawt a ni ang a, seat 30 ve ve hawn a ni ang. A zir tur te hi JEE paltlang an nih a ngai a, a bak chu Entrance Test kalpui a ni leh ang a, Mizoram Polytechnic Lunglei atanga Diploma in Civil leh Computer Sc zir zo an awm chuan Entrance Test hi an ti thei ang a. Principal puitling an la awm dawn chiah loh avangin MPL Principal nilai Pu Lalnuntluanga chu Acting Principal atan a dah a ni a, thawktu dangte erawh la lak zui tur ni a sawi a ni.

<><><>

CEC MOTION

Rajya Sabha Chairman C P Radhakrishnan leh Lok Sabha Speaker Om Birla te chuan Opposition memberten Chief Election Commissioner Gyanesh Kumar bang tura nawrna motion an thehluh chu an hnawl. Rajya Sabha Secretariat leh Lok Sabha Secretariat te chuan a hran ve ve a thuchhuah siamin Opposition te motion notice thehluh hi uluk taka endik a ni a. Tan bik nei loin thlirna hrang hrang atanga thlir anih hnuah Rajya Sabha Chairman leh Lok Sabha Speaker te chuan he notice of Motion hi an hnawl ta a ni.

Tun tum hi Parliament rorelna inhnih Lok Sabha leh Rajya Sabha-a a ruala CEC bang tura motion thehluh anih vawikhatna a ni a. CEC Gyanesh Kumar hian awn lam bik neiin hna a thawkah an puh a ni.

<><><>

ELECTION CAMPAIGN

Tamil Nadu Assembly inthlan leh West Bengal inthlan thawhkhatna chuh tumte tana nomination thehluh hun chu nimin khan a tawp a. Vawiinah nomination paper te hi endik a ni ang. Tun thla ni 9 thleng inhnudawhna hun hawn a ni a. Tamil Nadu ah hian seat 234 ah vote thlak a ni ang a. West Bengal ah hian inthlan thawhkhatnaah seat 152 ah vote thlak a ni dawn a. Tun thla ni 23 ah inthlan a ni ang a. Tun thla vek ni 29 ah West Bengal Assembly inthlan thawh hnihna hi neih a ni ang.

Hetihlai hian Assam, Keralam leh Puducherry ah te naktukah Assembly inthlan campaign chu vawiinah a tawp tawh dawn a. Nimin khan Political Party ten theihtawp an chhuah a. Assam ah hian seat 126 ah inthlan a ni ang a, Keralamah seat 140 leh Puducherry ah seat 30 ah Ningani ah inthlan a ni ang.

